

IKQ AKABARE EDI OBUKIDEM

John 1:1-34; Ñwed Mbon Colossae 1:15-18;

Mme Hebrew 1:1-3

QYQHQ UKPEP-ÑKPO 27

Eke Mkparawa

**IKQ IBUOT: “Ndien Abasi okut kpukpru se enye akanamde, ndien, sese efɔn eti eti”
(Genesis 1:31).**

Ke Eritɔnɔ

Matthew ye Luke etiñ ediye mbuk Jesus enɔ nnyin, Enye emi edide Eyen Abasi emi akamanade ke usin udia ufene ke Bethlehem okonyuñ edide ke ererimbot emi nte nsek eyen onyuñ akabare edi asaña-utom ye ɔkwɔrɔikɔ Abasi, ke akpatre Enye akpa man afak nnyin osio ke mme idiɔk-ñkpɔ nnyin.

John, mbet emi Ọbɔñ amade, etiñ abaña mbuk emi ñko ke usuñ efɛn. Enye ada nnyin afiak edem aka ke eritɔnɔ, mbemiso edibot ererimbot, ndien enye etiñ ete ke Ikɔ (emi enye anamde añwaña ekedi Jesus) ama ebemiso odu do. Idaha oro, enye etiñ ɔnɔ nnyin ete ke ema enam IKQ “akabare edi obukidem onyuñ oduñ ye nnyin.” Emi edi usuñ emi John adade anam nnyin ifiɔk ite ke Jesus ama edi ke ererimbot emi nte ekpri eyen, onyuñ oduñ ke isiɔn nte mme mmɔ efɛn eduñde.

Edi John etiñ ñkpɔ emi akande oro ɔnɔ nnyin. Enye añwana ndinam nnyin ikut adaña nte Jesus okponde onyuñ okopde odudu, ke nditim ntiñ, Enye okpon akan nte nnyin ikemedede ndifiɔk. Enye edi Eyen Abasi, ñko Enye edi ukem ye Abasi. Nnyin ikot ke Ñwed Mbon Colossae 1:15 ite ke Jesus edi mbiet Abasi, Enye emi enyin owo mikwe; ndien Enye ama ododu mbemiso edibot ñkpɔ kiet ekededi emi odude ke ererimbot. Mbuot Abasi esine Owo Ita; Abasi Ete, Abasi Eyen, ye Abasi Edisana Spirit. Kpukpru mmɔ enyene ubɔk ke utom obot, ndien John etiñ ete ke Jesus miduhe owo inamke ñkpɔ baba kiet emi ekenamde. “Koro ofuri Uyɔhɔ Abasi ke ododuñ Enye ke idem” (Ñwed Mbon Colossae 2:9).

Jesus Ama Ebem Iso Odu

Micah, anditiñ-ntiñ-nnim ikɔ Akani Ediomɔ, ama etiñ ebiet emi Christ akpamanade, onyuñ etiñ ñko abaña nte Enye ama okododu: “Ndien afo Bethlehem Ephratah, emekpri ke otu mme tɔsin Judah, edi owo eyeto fi ke esit ɔnɔ mi, eke edidide andikara ke Israel; enye emi eriwɔrɔ esie okodude tutuko, kpa ke eyo eset” (Micah 5:2). Jesus ke Idemesie ama etiñ abaña nsinsi uwem Esie ke ini Enye ɔkɔbɔñde akam ɔnɔ Abasi; “Ndien ke emi, Ete, da ubɔñ eke ñkenyenede ye Afo ndien ererimbot edidu, nɔ Mi” (John 17:5).

Ke ini nnyin itiñde inɔ ñkpri nditɔ-ɔwɔñ ite ke Abasi akanam kpukpru ñkpɔ, ediwak ini mmɔ enyene ndibup, “Anie akanam Abasi?” Iduhe owo ndomo kiet emi okobotde Abasi Ete, Abasi Eyen mme Abasi Edisana Spirit; mmɔ ema edudu; mmɔ inyeneke eritɔnɔ inyuñ inyeneke utit. Mme ekikere nnyin ikemeke ndifiɔk emi; nnyin ikemeke ndikere ñkpɔ mbe eritɔnɔ ini; edi nnyin imonim ke akpanikɔ koro emi edide Ikɔ Abasi.

Kere baña mbɔm Abasi emi ɔkɔnɔde Jesus edi ke ererimbot ndikut ukut nnɔ mme anam idiɔk. Ndusuk mme owo ikemeke ndinim ke akpanikɔ ite ke Jesus ekedi ata Eyen Abasi, edi nnyin imeti ite ke ini Enye ekedide ndina uduɔk-mmɔñ ke akpa Jordan ke ubɔk John ɔduɔk-owo -mmɔñ, John ama okut Enye nte edide, ndien enye ama anam efiɔk ke ofuri unyime esit, “Sese, Eyen-erɔñ Abasi emi emende mme idiɔk-ñkpɔ ererimbot efɛp. “Enye eketiñ ete, ‘Ami mma nnyuñ ñkut, nnyuñ ntiɛ ntiense nte, Emi edi Eyen Abasi.’” Enye ama onim ke akpanikɔ, ñko, ete ke Jesus ama odu toto ke eritɔnɔ, koro enye eketiñde ete, “Enye emi etienede mi ke edem akabare ebem mi iso, koro Enye ekebemde mi iso odu.”

Anditɔnɔ Uwem

Jesus akanam kpukpru ñkpɔ. Ke akande oro, edi ekesin Enye esin uwem ke mmɔ. Owo ke mbufiɔk esie enyene ukeme ndinam ediwak mme utibe ye mme ñkpɔ eke efɔnde, edi akananam enye ikemeke ndisin uwem ke ñkpɔ ekededi. Ukpep-ñkpɔ owo emi etiñde nte ñkpɔ ekesañade edu ke ererimbot, ikemeke nditiñ nnɔ nnyin ebiet emi uwem otode; ntɔnɔ ukpep-ñkpɔ mmɔ enyene nditɔnɔ ye uwem emi ama okodudu mi, ndien mmɔ etɔnɔ ndida ifiɔk mmɔ nto do. Kpa ye oro, ekikere mmɔ isañake ikekem ye eti ibuo. Edi Edisana Ñwed Abasi etiñ ɔnɔ nnyin ete ke Abasi eketiñ ikɔ; ndien mme eto ekɔri, edu uwem. Abasi akanam mme unam kiet kiet ke oruk esie, ndien mmɔ edu uwem enyuñ eman nditɔ ke oruk mmɔ. Akananam enañ-mbakara ikabakere idi ata enañ; añwa ndomo kiet akananam ikabakere idi ebua; edi mmɔ esuk edu kiet kiet “ke oruk esie,” nte Abasi akanamde mmɔ.

Ema ekut ndusuk ibokpot mbakara ke itie udi nditɔ Egypt emi ekebighe de ke isua tɔsin ita, edi uwem emi Abasi ekesinde ke esit ñkpri ñkeñe ibokpot emi okosuk ododu do. Ke ini eketɔde enye, ama ɔkɔri onyuñ oñwum

ukem ukem ibokpot emi mme owo esitode kpukpru isua ke mme isua 3,000 oro. Abasi akanam enye edi ibokpot toño ke eritono, ndien enye okosuk edi ibokpot.

Unana ukeme ke owo ndino nnyin uwem emi nnyin iynomde ndida ndu ke ererimbot edi se emende ewut ke usuñ efen. Emenere ewut ete ke ekeme ndinam mmōñ-eba ke usuñ ifiok idem owo nto ke ukem ñkpō emi enañ esitade; enyuñ enam awak eti eti oto ke ukem ñkpō emi, edi uwem anana ke ñkpō emi. Nsek eyen emi ebokde ke oruk udia emi enyene ndikop uyuhō, edi enye eyekop biñ onyuñ akpa ke mme ofiñ ifañ. Oro edi kiet ke otu mme ñkpō mkpaidem emi Abasi onode enañ ndien owo iduhe nditimere enye, oro edi ñkpō mkpaidem emi odude ke uwem.

Uwem Spirit

Uwem obukidem emi Abasi onode nnyin edi utibe onō nnyin, edi Jesus ikadaha emi nte akpan ñkpō nte Enye adade uwem nnyinke ñkañ Spirit. Eda nnyin edomo ye mbiet, nte flawa iñwañ, emi qosode ndiyemere nnyuñ mbe mfep (Isaiah 40:6-8); ñko nte ntuhube “emi qworode ke ekpri ini, ndien ebe efep” (James 4:14). Enye esitiñ kpukpru ini abaña mme idiok owo nte mme akpaña-mkpa koro mmō mikobohō erinyaña mme ndimana obufa.

Owo eke enyenede Eyen enyene uwem oro; owo eke minyeneke Eyen Abasi inyeneke uwem oro” (1 John 5:12). Nnyin imokut ke Ikō Abasi oro se Jesus adade nte uwem. Enye etiñ ete, “Ami ndi usuñ ye akpanikō ye uwem” (John 14:6), ndien edieke nnyin minyeneke Jesus ke uwem nnyin, nnyin inyeneke uwem. Edieke nnyin idade Jesus isin ke esit nnyin, Enye onō nnyin odudu ndidi ndito Abasi, onyuñ onō nnyin uwem emi midikureke. Nnyin iyeduñ ke obio Abasi ye Enye ke nsinsi-nsinsi.

Uñwana

Jesus okokot uwem eke ñkañ Spirit emi ete **uñwana**. Enye ama etiñ onō mbet Esie ete “Ami ndi uñwana ererimbot;” ke ini efen Enye ama etiñ ete “Mbufo edi uñwana ererimbot.” Ikō Greek emi adade onō **uñwana** ke ini etiñde ekedian Jesus edi **phos**, emi edi uñwana ke idemesie; edi uñwana emi ekotde edian Anditiene Christ edi **phoster**, emi adade onō ñkpō ukama ikañ. Ke ntre nnyin imokut ite ke ini Jesus odukde edi ke esit nnyin, nnyin ikabare idi uñwana ñkpō, emi anamde uñwana Jesus ayama qworō ke uwem nnyin. “Kpa ntre yak uñwana mbufo ayama ke iso owo, man mmō ekut nti utom mbufo, enyuñ etoro Ete mbufo emi odude ke heaven” (Matthew 5:16).

Uñwana Jesus ama ayama ke ekim (emi qworō ete ayama onō mme idiok owo) edi ibat ibat owo ekebō uñwana emi, koro mme owo emama ekim ekan uñwana, koro mme utom mmō edioke. Kpukpru ini afo eyekut ete ke idiok owo ikemeke ndikop inem ke enye odude ke ebiet emi eti eyen Abasi odude, koro enye imaha uñwana emi ayamade oto Anditiene-Christ emi. Spirit Abasi emi odude ke idem ndito Esie obobiom mme owo ikpe ke abaña mme idiok-ñkpō mmō. Ofon didie nnyin ndinyene Spirit Esie ke uwem nnyin qyohō-qyohō!

Owo kiet ekededi ekeme ndinyene nsinsi uwem edieke enye afiakde etiene Abasi onyuñ ayarare mme idiok-ñkpō esie. Jesus akakpa man “owo ekededi eke obuotde idem ye Enye okutak, edi enyene nsinsi uwem.” Enye ekedi ata Uñwana, “emi anamde enyin añwaña kpukpru owo okododuk ke ererimbot.”

Abasi oyom ndito esie ke mme ñkim-ñkim idiok usen emi eyak uñwana mmō ayama man mme owo ekpekeme ndikpep usuñ ndika heaven. Ke utō ntak oro, nnyin inyene ndikut nte ke uñwana nnyin ayama nte ofonde ekem.

“Yak uñwan’ osuk ayama

Nam ayama ‘be k’inyañ

Emekeme ndinyaña

Ow’ ubom akpade mba.

MME MBUME

- 1 Siak mmō emi enamde mbuot Abasi ita ke kiet.
- 2 Nso ikedi etop emi John okonode ererimbot?
- 3 Nso ikedi ntak emi ekenode Jesus edi ke ererimbot?
- 4 Mme owo ekeme didie ndifiok ete ke nnyin imobohō uwem idiok-ñkpō?
- 5 Didie ke Abasi etiñ ikō onō nnyin?